



蘇文忠公集卷第七十八

表狀

謝恤刑詔書二首

時令舉行雖云故事天心惻怛本出至誠德既洽於  
好生民雖死而無憾中謝伏以刻木畫地志士不居  
鑠石流金平人猶病宜軫聖神之念實為哀痛之先  
訓告叮嚀吏民感動恭惟陛下禹湯罪已堯舜性  
仁以不忍人之心行若稽古之政豈止緩獄實期無  
刑臣敢不推廣上恩厚風俗於無犯申嚴法意銷盜  
賊於未萌少假歲時庶空囹圄

暑雨其咨既軫小民之病麥秋已至復虞輕繫之淹  
祗服訓辭灼知天意中謝伏以仁聖之德哀矜為先  
惟內恕以及人故深居而念遠齋戒處掩則知暴露  
之難一作勤紛締裨延不忘縲紲之苦吏既罔懈民知  
無冤恭惟 太皇太后陛下事法祖宗德參天地凱  
風養物散為扇暍之涼靈雨應時同沾執熱之濯臣  
敢不盡其哀敬濟以寬明奉法律之嚴毋令慘酷推  
慈母之意務在平和庶竭愚忠少行德意

定州到任謝上表

兵民專寄本禦侮以折衝疆場久安但坐嘯而畫諾

才微祿厚恩重命輕中謝伏念臣一去闕庭三換符  
竹坐席未暖召節已行筋力疲於往來日月逝於道  
路未經周歲復典兩曹朝廷非不用臣愚憊自不安  
位所宜竄逐更冒寵榮此蓋 皇帝陛下離明正中  
乾剛獨運追述東朝之遺意收此散材眷言西學之  
舊臣付之善地致此衰朽尚不棄捐臣敢不勤卹民  
勞密脩邊備苟無大過以及暮年漸還魚鳥之鄉以  
畢桑榆之境

賀興龍節表

天祐我邦祥開是日山川奠瑞日月增華臣伏以上

聖所儲有慈儉不爭之寶輿情共獻蓋憂動無逸之  
龜不待禱祠而求自然天人之應共惟 皇帝陛下  
堯仁舜孝禹勤湯寬德莫大於好生故以不殺為神  
武道莫尊於問學故以所聞為高明敷錫庶民嚮用  
五福臣備員內閣出守近畿雖違咫尺天威乃身在  
外而上千萬歲壽此意則同

慰元正表

嗣歲將興雖有作新之慶舊穀既沒共深追遠之思  
凡在照臨舉增懷慕伏惟 皇帝陛下道躋堯禹行  
比騫參方受圖於三朝明發不寐念御簾於雙日孝

思奈何幸寬罔極之哀少副有生之望臣限廢官守  
阻造闕庭

慰山陵禮畢表

恭聞今月七日大行 宣仁聖烈太皇太后山陵禮  
畢者日月有時義當即遠雨露既降思則無窮遙知  
穆穆之光尚起皇皇之望臣其誠感誠懼頓首頓首  
恭惟 皇帝陛下道循祖武德契天心大哉孔子之  
仁法然流涕至矣顯宗之孝夢若平生願寬舜慕之  
心少副堯封之祝

慰祔廟禮畢表

恭聞今月十七日 宣仁聖烈皇后升祔禮畢者反  
寢而虞既盡飾終之典宅神于廟益隆追遠之思凡  
在照臨共增悲慕臣某誠感誠懼頓首頓首竊以六  
朝繼聖並傳家法之餘三后御簾高出古人之右逮  
此登配廓然永懷恭惟 皇帝陛下奉順母慈表章  
坤德四謚哀榮之詔簡策有光數詩挽餞之音道塗  
垂涕日月云遠典禮告成願寬無益之悲少副有生  
之望

謝衣襖表

齊官二服已寬卒歲之憂漢札十行更佩先春之暖

恩均吏士聲動華夷臣某中謝伏以禮著始表詩歎  
無褐邊陲更戍本為臣子之常朔易早寒特軫聖神  
之念惟德其物豈曰無衣恭惟 皇帝陛下廣運聰  
明力行恭儉威風旁振方戰慄於天驕溫詔下融遂  
流澌於河凍既無功而坐食實有愧於解衣敢不推  
廣朝廷之仁益收凍餒申嚴祖宗之法少肅惰媮庶  
收汗馬之勞以解濡鷄之誚

謝賜曆日表

夙頒溫詔寵拜新書吏得承宣民知蚤晚臣某誠感  
誠懼頓首頓首臣聞言天道者有數故曆以時頒作

潤猷訓農事者在人則王無罪歲豈獨典常之舊必  
存忠利之心恭惟 皇帝陛下輔相裁成聰明時憲  
居德刑於冬夏意與天同暨聲教於朔南責在臣等  
敢不時使薄斂思患預防勤恤鰥孤幸流亡之盡復  
兼明威惠庶戎夏以皆安

謝惠州安置表

仁聖曲全本欲界之民社群言交擊必將致之死亡  
尚荷寬恩止投荒服臣中謝伏念臣性資褊淺學術  
荒唐但信不移之愚遂成難赦之咎迹其狂妄久合  
誅夷方尚口乃窮之時蓋擢髮言數其罪豈謂天幸

得全此生此蓋伏遇 皇帝陛下大有為之資行不忍  
人之政湯網開其三面舜工舞于兩階念臣奉事有  
年少加憐憫知臣老死無日不足誅鋤明降德音許全  
餘息故使虺隤之馬猶獲至血惟穀練之牛得逭一作  
刀匕一作臣敢不祗膺嚴訓託命至仁洗心自新沒  
齒無怨但以瘴癘之地魑魅為鄰衰疾交攻無復首  
丘之望精誠未泯空餘結草早之忠

密州謝上

臣軾言昨奉勅差知密州軍州事已於今日三月三日  
任上訖草芥賤微敢干洪造乾坤廣大曲遂私誠受

命撫躬已自知於不稱入境問俗又復過於所期臣  
軾中謝伏念臣家勢至寒性資甚下學雖篤志本先  
朝進士篆刻之文論不適時皆老生常談陳腐之說  
分於聖世處以散材一自離去闕庭屢更歲籥塵埃  
筆硯都忘舊學之淵源空乏簿書粗識小人之情偽  
欲自試於民社庶有助於涓埃以為公朝不廢私願  
攜孥上國預憂桂玉之不充請郡東方實欲弟昆之  
相近自惟何幸動獲所求雖父兄所以處臣其僥倖  
不過如此雖云踈外有以遭逢此蓋伏遇皇帝陛下  
躬上聖之資建太平之業以謂人無賢愚皆有可  
用故雖如臣等輩猶未盡捐臣敢不仰認至恩益堅  
素守推廣中和之政撫綏疲瘵之民要使民之安臣  
則為臣之報國臣無任瞻天荷聖激切屏營之至謹  
奉表稱謝以聞

徐州謝上表

臣軾言分符高密已竊名邦改命東徐復塵督府荷  
恩深厚撫已兢慙臣軾中謝伏念臣奮身農畝託迹  
書林信道直前自無坎井之避立朝寡助誰為先後  
之容向者屢獻瞽言仰塵聖鑒豈有意於為異蓋篤  
信其所聞顧慙迂闊之言雖多而無益惟有朴忠之

素既久而猶堅遠不忘君未忍改其常度言之無罪  
實深恃於至仁知臣者謂臣愛君不知臣者謂臣多  
事空懷此意誰復見明伏惟 皇帝陛下日月照臨  
乾坤覆燾察孤危之易毀矜諒直之無他安全陋軀  
界付善地民溥訟簡殊無施設之方食足身閑仰愧  
生成之賜顧力報之無所懷孤忠而自憐謹奉表稱  
謝以聞

徐州謝獎諭表

臣軾言伏奉今月四日勅以臣去歲脩城捍水粗免  
疎虞特賜獎諭者奔走服勤人臣之常事褒稱勞勩

學者之至榮自惟何人乃辱斯語臣軾誠惶誠恐頓  
首頓首伏念臣學無師法才與世疎經術既已不深  
吏事又其所短累忝優命可卒無異稱寬如定遠之言  
平平無取拙此道州之政以下下宜然乃者河決澶淵  
毒流淮泗百堵皆作蓋際吏之劬勞三板不沉本朝  
廷之威德而臣下掠衆在上貪天功獨竊爾書之榮  
以為私室之寶此蓋伏思 皇帝陛下天覆四海子  
養萬民哀無辜之遭罹特遣使以存問既蠲免其賦  
調又飲食其飢寒所以錙錖臣之微勞蓋將責臣之來  
効臣敢不躬親畚築益收今歲之防安集流亡盡復

平時之業庶殫朽鈍少補絲毫臣無任瞻天荷聖激切屏營之至謹奉表稱謝以聞

徐州賀河平表

臣軾言竊聞黃河決口已遂閉塞者聖謨獨運天眷莫違庶邦子來民罔告病萬杵雷動役不逾時遂消東北莫大之憂然後麥禾可得而食人無後患喜若再生臣軾中謝伏以大河為災歷世所病禹治兗州之野十有三載乃同漢鎭宣防之宮二十餘年而定未有收狂瀾於既潰復故道於將堙俛仰而成神速若此恭惟 皇帝陛下至仁博施神智無方達四聰

以來衆言廣大孝以安宗廟水當潤下河不溢流屬歲久之無虞故患生於所忽心方其決也本吏失其防而非天意及其復也蓋天助有德而非人功振古所無溥天同慶維豐沛之大澤實汴泗之所鍾伊昔橫流漂孤城之若塊迨茲平定蔚秋稼以如雲害既廣則利多憂獨深而喜倍雖官守有限不獲趨外庭以稱觴而民意所同亦能抒下情而作頌臣無任云云

湖州謝上表

臣軾言蒙恩就移前件差遣已於今日二十日到任上訖者風俗阜安在東南號為無事山水清遠本朝

廷所以優賢碩惟何人亦與茲選臣軾中謝伏念臣  
性資頑鄙名迹堙微議論踳踈文章淺陋凡人必有  
一得而臣獨無寸長荷先帝之誤恩擢實三館蒙  
陛下之過聽付以兩州非不欲痛自激昂少酬恩造  
而才分所局有過無功法令具存雖勤何補罪固多  
矣臣猶知之夫何越次之名邦更許借資而顯授顧  
惟無狀豈不知恩此蓋伏遇 皇帝陛下天覆群生  
海涵萬族用人不求其備吉茹善而矜不能知其愚不  
適時難以追陪新進察其老不生事或能牧養小民  
而臣頃在錢塘樂其風土魚鳥之性既自得於江湖

到黃州謝表

吳越之人亦安臣之教今敢不奉法勤職息訟平刑  
上以廣朝廷之仁下以慰父老之望臣無任瞻天荷  
聖激切屏營之至謹奉表稱謝以聞

臣軾言去歲十二月二十九日准勅責授臣檢校尚  
書水部員外郎充黃州團練副使本州安置不得簽  
書公事臣已於今日到本州訖者狂愚冒死固有  
常刑仁聖矜憐特從輕典赦其必死許以自新祇服  
訓辭惟知感涕中謝伏念臣早緣科第誤忝縉紳親  
逢睿哲之興遂有功名之意亦嘗召對便殿考其所

學之言試守三州觀其所行之實而臣用意過當日  
趨於迷賦命衰窮天奪其魄叛違義理辜負恩私茫  
如醉夢之中不知言語之出雖至仁屢赦而衆議不  
容按罪責情固宜伏斧鑕於兩觀推恩屈法猶當禦  
魑魅於三危豈謂尚玷散員更叨善地投畀磨廳之  
野保全樗櫟之生臣雖至愚豈不知幸此蓋伏遇  
皇帝陛下德刑並用善惡兼容欲使法行而知恩是  
用小懲而大戒天地能覆載之而不能容之於度外  
父母能生育之而不能出之於死中伏惟此恩何以  
為報惟當既食沒齒杜門思愆深悟積年之非永為

多士之戒貪戀聖世不敢殺身庶幾餘生未為棄物  
若獲盡力鞭箠之下必將捐軀矢石之間指天誓心  
有死無易臣無任瞻天荷聖感涕激切屏營之至謹  
奉表稱謝以聞

謝徐州失覺察妖賊放罪表

臣軾言去年十二月十五日准淮南轉運司牒奉  
聖旨差官取勘臣前任知徐州日不覺察百姓李鐸  
郭進等謀反事臣尋具析在任日曾選差沂州百姓  
程棐令緝捕凶逆賊人致棐告獲前件妖賊因依乞  
勘會施行至今年七月二日復准轉運司牒奉 聖

旨蘇軾送尚書刑部更不取勘盜發所臨守臣固當重責罪疑則赦聖王所以廣恩自驚廢逐之餘猶在愍憐之數臣軾誠惶誠懼頓首頓首伏念臣早蒙殊遇擢領大邦上不能以道化民達忠孝於所部下不能以刑齊物消姦宄於未萌致使妄庸敢圖僭逆原其不職夫豈勝誅况茲溝瀆之中重遇雷霆之譴無官可削撫已知危至於捕斬群盜之功乃是鄰近一夫之力靖原其始偶出於臣雖為國督姦常懷此志而因人成事豈足言勞勉自効於涓埃庶少寬於斧鉞豈謂蕩然之澤許以勿推收驚魄於散亡假餘生

之畧刻退思所自為幸何多此蓋伏遇 皇帝陛下舞虞舜之干示人不殺祝成湯之網與物求生其間用刑本不得已稍有可赦無不從寬務在考實而原情何嘗記過而忘善益悟向時之所坐皆是微臣之自貽感愧終身論報無地布衣蔬食或未死於飢寒石心木腸誓不忘於忠義臣無任瞻天荷聖感恩思報激切屏營之至謹奉表稱謝以聞

謝量移汝州表

臣軾言伏奉正月二十五日詔命特授臣汝州團練副使本州安置不簽書公事者稍從內遷示不終棄

罪已甘於萬死恩實出於再生祇服訓詞惟知感涕  
臣軾誠惶誠恐頓首頓首伏念臣向者名過其實食  
浮於人兄弟並竊於賢科衣冠或以為盛事旋從冊  
府出領郡符既無片善可紀於絲毫而以重罪當膏  
於斧鉞雖蒙恩貸有愧平生隻影自憐命寄江湖之  
上驚魂未定夢游縲紲之中憔悴非人章狂失志妻  
孥之所竊笑親友至於絕交疾病連年人皆相傳為  
已死飢寒併日臣亦自厭其餘生豈謂草芥之賤微  
尚煩朝廷之記錄開其恫悔許以甄收此蓋伏遇  
皇帝陛下湯德日新堯仁天覆建原廟以安祖考正

六官而修典刑百廢具興多士爰集彈冠結綬共欣  
千載之逢掩面向隅不忍一夫之泣故推涓滴以及  
焦枯顧惟効死之無門殺身何益更欲呼天而自列  
尚口乃窮徒有此心期於異日臣無任云云

乞常州居住表

臣軾言臣聞聖人之行法也如雷霆之震草木威怒  
雖甚而歸於欲其生人王之罪人也如父母之譴子  
孫鞭撻雖嚴而不忍致之死臣漂流棄物枯朽餘生  
泣血書詞呼天請命願回日月之照益一作明葵藿之心  
此言朝聞夕死無憾臣軾誠惶誠恐頓首頓首臣昔

者嘗對便殿親聞德音似蒙聖知不在人後而狂狷  
妄發上負恩私既有司皆以為可誅雖明主不得而  
獨赦一從吏議坐廢五年積憂薰心驚齒髮之先變  
抱恨刻骨傷皮肉之僅存近者蒙恩量移汝州伏讀  
訓詞有人材實難弗忍終棄之語豈獨知免於縲紲  
亦將有望於桑榆但未死亡終見天日豈敢復以遲  
暮為歎更生僥覲之心但以祿廩久空衣食不繼累  
重道遠不免舟行自離黃州風濤驚恐舉家重病一  
子喪亡今雖已至泗州而貨用罄竭去汝尚遠難於  
陸行無屋可居無田可食二十餘口不知所歸飢寒

之憂近在朝夕與其強顏忍耻下一作求於衆人不  
若歸命投誠控告於君父臣有薄田在常州宜興縣  
粗給饘粥欲望聖慈許於常州居住又恐罪戾深重  
未可聽從便安輒敘微勞庶蒙恩貸臣先任徐州日  
以河水浸城幾至淪陷臣日夜守捍偶獲安全嘗蒙朝  
廷降勅獎諭又嘗選用沂州百姓程棐令曠捕凶黨  
致獲謀反妖賊李鐸郭進等一十七人亦蒙分聖恩保  
明放罪皆臣子之常分無涓埃之可言冒休自陳出  
於窮迫庶幾因緣僥倖功過相除稍出羈囚得從所  
便重念臣受性剛褊賦命奇窮既獲罪於天又無助

於下怨仇交積罪惡橫生群言或起於愛臨伯孤忠遂  
陷於疑似中雖無愧不敢自明向非人主獨賜保全  
則臣之微生豈有今日伏惟 皇帝陛下聖神天縱  
文武生知得天下之英材已全三樂躋斯民於仁壽  
不棄一夫勃然中興可謂盡善而臣抱百年之永嘆  
悼一飽之無時貧病交攻死生莫保雖鳧鴈飛集何  
足計於江湖一作廷而犬馬蓋惟猶有求於君父一作下  
敢祈仁聖少賜矜憐臣見一面前去南京聽候朝旨  
下冒天威臣無任

到常州謝表二首

臣軾言先蒙恩授汝州團練副使本州安直尋上表  
乞於常州居住奉 聖旨依所乞臣已於今月二十  
二日到常州訖者積釁難磨未經洗濯至仁易感許  
即便安祇荷寵靈惟知感涕中謝伏念臣所犯罪戾  
本合誅夷向非先帝之至明豈有餘生於今日銜恩  
未報有志不從已分沒身寄殘骸於魑魅取期擇地  
收暮景於桑榆此蓋伏遇 皇帝陛下仁孝生知聰  
明天縱寅奉上帝之眷命述修累聖之成誥念此管  
蒯之微庶幾簪履之舊俾安田畝稍出縲囚飽食無  
思但日陶於新化杜門自省當益念於徃愆臣無任

臣軾言先蒙恩授汝州團練副使本州安望且尋上表  
乞於常州居住奉 聖旨依所乞臣已於今月二十  
二日到常州訖者罪大人微自甘永棄食分貝口衆未  
免求安忽奉俞音出於獨斷仰銜恩施不覺先涕零中  
謝伏念臣猥以凡才早塵仕籍生逢有作之聖獨抱  
不移之愚惡廢棄六年已忘形於田野泝沿黃河里偶脫  
命於江湖一作潭豈謂此生得從所便此蓋伏遇 太  
皇太后陛下厚德載物至仁代天春生秋成本無心  
於草木風行雷動自有信於蟲魚致此幽頑亦叨恩  
膏耕田鑿井得漸齒於平民碎首剗肝尚未知其死

所臣無任

登州謝上表三首

臣軾言伏奉告命授臣朝奉郎知登州軍州事臣已  
於今月十五日到任上訖者登雖小郡地號極邊自  
驚縲綆之餘忽有民社之寄拜恩不次隕涕何言中  
謝臣聞事一作臣不密則失身而臣無周身之智人不  
可以無學而臣有不學之愚積此兩愆本當萬死坐  
受六年之謫甘如五鼎之珍擊鼓登聞止求自便買  
田陽羨誓畢此生豈期枯朽之中有此遭逢之異收  
召魂魄復為平人洗濯瑕疵盡還舊物此蓋伏遇

皇帝陛下內行魯閔之孝外發禹湯之仁日將旦而四海明天方春而萬物作於其黨而觀過謂臣或出於愛君就所短而求長知臣稍習於治郡致茲異寵驟及非才恭惟先帝全臣於衆怒必死之中陛下起臣於散官永棄之地沒身難報碎首為期臣無任臣軾言伏奉告命授臣朝奉郎知登州軍州事臣已於今月十五日到任上訖者寵命過優訓詞尤厚非臣愚蠢所克承當臣所領州下臨漲海人淳事簡地瘠民貧入境問農首見父老戴白扶杖爭來馬前皆云枯槁之餘死亡無日雖在田野亦有識知恭聞聖

母至明而慈嗣皇至仁而孝每下號令人皆涕流頓延一作垂死之年以待惟新之政言雖下甚拙意則可知見朝廷擢臣於久廢之中謂臣愚必有以少塞其責或能推廣上意惠康小民而臣天資不鈍頑學問寡淺心已耗於多難才不周其一身將何以上答聖知下慰民願伏惟太皇太后陛下以任一作如之位行堯舜之仁勤邦儉家永為百王之令典時時使薄斂故得萬國之歡心豈煩燭火之微更助日月之照但知奉法不敢求名臣無任

杭州謝上表二首

臣軾言伏奉制書除臣龍圖閣學士知杭州臣已於  
今月三日到任上訖者始衰而病豈非滿溢之災乞  
越得杭又過平生之望伏念臣起自庶黜驟登禁嚴  
畢命驅馳未償萬一懷安退縮豈所由然蓋散材不  
任於斧斤而病馬空糜於芻粟故求外補以盡餘年  
豈期避寵而益榮求閑而得劇此蓋以遇 皇帝陛  
下剛健中正緝熙光明無為蓋虞舜之仁篤學有仲  
尼之智而臣猥以末技日奉講惟凜然威光近在咫  
尺惟古人責難之意每不自量方 陛下好問之初  
遽以疾去推之理數可謂竒窮荷春 遇之不移竊思

榮而愈重雖雨露之施初不擇物而犬馬之報期於  
殺身臣無任

臣軾言伏奉制書除臣龍圖閣學士知杭州臣已於  
今月三日到任上訖者入奉禁嚴出膺方面皆人臣  
之殊選在儒者以尤榮伏念臣受寵逾涯積憂成疾  
既思退就於安養入欲少逃於滿盈仰荷至仁曲從微  
願江山故國所至如歸父老遺民與臣相問知朝廷  
輟近侍為太守至聖主視天下如一家鞭朴未施爭  
訟幾絕臣之厚去十豈易名言此蓋伏遇 太皇太后  
陛下天地之仁賢愚兼取日月之照邪正自分每包

函其憊迂欲保全其終始兄弟孤立嘗親奉於德音  
死生不移更誓以於晚節臣無任

杭州謝放罪表二首

臣某言臣近以法外刺配本州百姓顏章顏益二人  
上章待罪奉 聖旨特放罪者職在承宣當遵三尺  
之約束事關利害輒從一切之便宜曲荷天慈不從  
吏議伏念臣早綴剛拙屢致憂虞用之朝廷則逆耳  
之憊形于言施之郡縣則疾惡之心見于政雖知難  
每以為戒而臨事于不能自回苟非日月之明安能肝  
膽必照則臣豈惟獲罪於今日久已見傾於衆言恭

惟 皇帝陛下濬招生知清明旁達委任群下退託  
於不能愛養成材惟恐其有過知臣欲去一方之積  
弊須除二猾以示民特屈憲臺以全器使臣敢不省  
循過咎祗服簡書眷此善良自不犯於漢法時有貸  
捨用益廣於堯仁臣無任

亂群之誅不請而決蓋恩威之無素致姦猾之敢行  
方俟譴訶豈期寬宥伏以法吏網密蓋出於近年守  
臣權輕無甚於今日觀祖宗信任之意以州郡責成  
於人豈有不擇師帥之良但知繩墨之馭若平居僅  
能守法則緩急何以使民顧臣不才難以議此恭惟

太皇太后陛下寬仁從衆信順得天推一身之至公  
納萬方於無罪而臣始終被遇中外蒙恩謂事有專  
而合宜情無他而可恕故加貸捨以示寵綏朝廷至  
明粗以臣為可信吏民自服當不令而率從臣無任

潁州謝上表二首

臣軾言伏奉云云支郡責輕未即滿盈於小器豐年  
事簡非徒飽煖於一家覽几席之溪湖雜簿書於魚  
鳥平生所樂臨老獲從中謝伏以汝潁為州邦畿稱  
首土風備於南北人物推於古今實主俱賢蓋宗資  
范孟博之舊治文獻相續有晏殊歐陽脩之遺風願

臣何人亦與茲選伏遇 皇帝陛下丕承六聖總攬  
群英生知仁孝之全學識文武之大謂臣簪履之舊  
物嘗忝帷幄之近臣奉事七年崎嶇一節意其忠義  
許國故暫召還察其老病畏人復許補外置之安地  
養此散材更少勉於桑榆誓不忘於畎畝臣無任  
臣軾言避嫌引疾慙無國士之風識分知難粗守人  
臣之節曲蒙溫詔遂假名邦已見吏民惟知感怍中  
謝伏念臣早緣多難無意軒裳晚以虛名偶塵侍從  
雖云時可每與願違既未決於歸田故力求於治郡  
慈母愛子但憐其無能明君知臣終護其所短自欣

投老漸獲安身此蓋 太皇太后陛下慈儉臨民剛柔布政參天地而有信喜怒不形體水鏡之無心忠邪自辨致茲愚直亦克保全雖任職居官無過人者而見危授命蓋有志焉

謝御膳表

臣伏蒙聖恩特賜寬假將理今月七日又再蒙中使臨賜御膳問其治療之增損督以朝參之日辰臣下履淵冰上負芒刺蹄涉雖小能延兩耀之光寸草何知莫報三春之澤正使豚魚幽陋木石堅頑亦將激勵忘軀奔走赴職而臣尚有無厭之請敢守不移之

愚在法當誅原情可憫實以負薪之疾積有歲時勿藥之祥恐非旦夕終願江淮之一郡以安犬馬之餘生尚冀此身未填溝壑期於異日別効涓埃

同天節進絹表

右伏以大人之德莫得而名萬壽之觴無物可稱前件絹土地所出賦租之餘敢輸向日之誠少備充庭之末

代滕達道湖州謝上表

郡壓五湖城交二水既先世舊居之地亦年少初仕之邦父老縱觀不謂微臣之尚在吏民感涕共知洪

造之難酬中謝臣聞忠臣可使死封疆而不能受無  
根之謗議志士本不求富貴而不能安有道之賤貧  
况臣早蒙希世之恩常有捐軀之意豈容曖昧略不  
辨明然疑似之難知實古今之通患漢文帝取負君也  
而不能信賈生之屈尹吉甫慈父也而不能雪伯奇  
之冤此小人譖夫所以得志而欺天忠臣孝子所以  
抱恨而入地况臣結累朝之深怨無半面之生九容而  
訴章朝聞恩詔夕下歷數千載惟臣一人此坐血伏遇  
皇帝陛下妙物言神睿思作聖謂天盖遠以躬躬呼而  
必聞如日之明雖浸潤而不受念茲七年之既收之

九死之餘臣敢不更勵初心明圖後効老當益壯未  
甘結草之幽途死且不辭尚以據鞍於前殿

代滕達道景靈宮奉

表

衣冠出游魏亭宮闕之盛祖以來赫赫然日月之明  
新禮光前彌文範後繼以作時之雷雨仍收繪像之  
子孫登觀華夷淪浹枯朽竊以祀蒸豐疎祭不欲泥  
自仁率親故同官而合享惟生作則實考古而便今  
庶民子來五福交應蔚山河之增氣紛嶽瀆以來朝  
仙木蟠根五聖既聯於龍袞雲之舞秀九莖復出於  
齋房 皇帝陛下舜孝格天堯文冠古損益漢唐之

典故潤色祖宗之規摹壽考萬年永作人神之主本  
支百世共承宗廟之休臣出遠方阻觀盛禮會祠  
壇下莫覩燁然之光留滯周臣竊興命也之歎

慰欽聖太后上僊表

臣某言伏觀 大行皇太后 遺詔者慄慄一作發六宮  
悲纏九土奉諱哀隕不知所口中中慰 大行皇太后  
德冠三朝化刑四海獨決大不措天下於泰山之安  
退避東朝復明辟為萬世之山壽終壽祿一作壽莫  
曉天心恭惟 皇帝陛下仁心自天哀傷過禮惟聖  
達節豈復行曾閔之難以民心則當法舜禹之大

願少寬於追慕庶下答於臣民臣以外郡居住不獲  
奔赴闕庭臣無任哀痛隕越不至

英州謝上表

罪盈義絕誅九族以猶輕威辰怒行真一州而大幸  
驚魂方散感涕徒零伏念臣世早芥賤儒岷峨冷袂龍  
先人之素業借一第以竊名雖幼歲勤勞實學聖人  
之大道而終身窮薄常為天下之罪人先帝念臣於  
衆怒必死之中 陛下起臣不散官永棄之地恩深  
報萬每憂天地之難欺福眇稠多是亦古今之罕有  
自悲棄物猶欲願天惟上聖祭宗廟之圖方太母聽

簾帷之政招延俊乂登進老成何期章句之謏才使  
掌絲綸之要職凡一時黜陟進退之衆皆兩宮威禡  
賞福之公既在代言敢思逃責苟不能敷揚上意專  
朝廷於日月之明則何以贊勳四方鼓號令於雷霆  
之震固當昭陳功罰直喻正邪豈巨愚敢有於私心  
蓋王言不可以匿旨當時之大奪其魄但謂守官今  
日之臣肆其言期於必戮賴父母之深憫免子弟之  
僭誅罪雖駭於聽聞怒終歸於寬宥不獨再生於東  
市猶令尸祿於南州累歲寵榮固已太過此時竄責  
誠所宜然瘡痍突隕去若清心之地蒼顏素髮難辨

衰暮之年恩重丘山感藏骨髓此蓋伏遇 皇帝陛下  
下智惟天錫行自生知巍巍繼六聖之神休孜孜盡  
二宮之孝養深原心迹曲示哀矜臣實何人恩常異  
衆在先朝偶脫其誅戮故此日復煩於典刑頑戾如  
斯生存何面臣敢不噬臍悔過吞舌知非革再三不  
改之愆庶萬一善終之望殺身莫喻敢懷窮困之憂  
守土非經尚畀遐荒之俗儻沐先朝之化永惟結草  
之忠臣無任

移廉州謝上表

使命遠臨初聞喪膽詔詞溫厚亟返驚魂拜望闕庭

喜溢頰面否極泰遇雖物理之常然昔棄今收豈罪  
餘之敢望伏膺知幸揮涕無從中謝伏念臣頃以狂  
愚遽遭譴責荷先帝之厚德寬蕭律之重誅投彼遐  
荒幸逃鼎鑊風波萬里歎衰病以何堪煙瘴五年賴  
喘息之猶在憐之者謂之已甚嫉之者恨其太輕考  
圖經止曰海隅其風土疑非人世食有併日夜無禦  
冬淒涼百端顛躓萬狀恍若醉夢已無意於生還豈  
謂優容許承恩而近徙雖云僥倖實有寅緣此蓋伏  
遇 皇帝陛下道本生知性由天縱舊勞于外爰及  
小人之依堪家多艱鑒于先帝之德奉聖母之慈訓  
擇正人而與居凡有嘉謀出於睿斷憫臣以孤忠接  
寡察臣以衆忌獲愆許以更新庶使改過天地有造  
化之大不能使人之再生父母有鞠育之恩不能全  
身於必死報期碎首言豈渝心濯於淤泥已有遭逢  
之便擴開雲日復觀於變之時此生敢更求榮處世  
但知緘默臣無任

復官提舉玉局觀謝表

臣某言先自昌化軍貶所奉勅移廉州安置又自廉  
州奉勅授臣舒州團練副使永州居住今行至英州  
又奉勅授臣朝奉郎提舉成都府玉局觀外州軍任

便居住七年遠謫不自意全萬里生還適有天幸驟  
從縲繼復齒縉紳中謝伏念臣才不逮人性多忤物  
剛褊自用可謂小忠猖狂妄行乃蹈大難皆臣自取  
不敢怨尤會真人之勃興與萬物而更始而臣獨存  
幽遠最為冥頑迨茲起廢之初倍費生成之力終蒙  
記錄不遂棄捐此蓋伏遇 皇帝陛下正位龍飛對  
時虎變神武不殺豈非受命之符清淨無為坐獲銷  
兵之福聰明不作邪正自分使臣得同草木之微共  
霑雷雨之澤一作解臣敢不益堅素守深念徃愆沒齒  
何求不厭飯蔬之陋蓋棺未已猶懷結草之忠臣無

任

乞致仕表

臣軾先自端明殿學士兼翰林侍讀學士朝奉郎定  
州路安撫使家因心落職降授承議郎知英州遂貶寧  
遠軍節度副使惠州安置經涉四年蒙恩責授瓊州  
別駕昌化軍安置又三年半該 陛下登極大赦量  
移廉州安置又經皇子赦恩移舒州團練使永州居  
住臣以老病久伏瘴毒頓仆道塗未至永州特蒙聖  
恩復授臣朝奉郎提舉成都府玉局觀外州軍任便  
居住臣素有薄田在常州宜興縣粗了饘粥所以崎

嶮萬里犇歸常州以盡餘年而臣人微罪重骨寒命薄難以受 陛下再生之賜於五月間行至真州瘴毒大作棄船至潤州昏不知人者累日今已至常州百病橫生四肢腫滿渴瘠唾血全不能食者二十餘日矣自料必死臣今行年六十有六死亦何恨但草木昆蟲貪生之意尚復留戀聖世以辭此寵祿或可苟延歲月欲望朝廷哀憐特許臣守本官致仕臣無任

謝兼侍讀表二首

叨承新命祇服訓詞薄技已窮舊恩未替伏念臣志大而才短論迂而性剛以自用不問之愚處衆人必爭之地不早退縮安能保全是以前三年翰墨之林屢遭飛語再歲江湖之上粗免煩言豈此身愚智之殊蓋所居閑劇之致臣之自處何者為宜而况講讀之司帷幄最近分章摘句則何以報非常之知因事獻言又必貽前日之患雖仰恃天日之照常實負冰淵之虞恭惟 皇帝陛下大德庇民小心順帝雖天覆地載以聖不可知為神而日就月將以學而不厭為智曲收舊物以廣多聞臣敢不職思其憂本無分於中外欲報之德擔不易於死生

用非真分寵至若驚滿溢之憂遂巡莫避伏念臣與  
弟某同登進士並擢賢科內外分掌於制書先後迭  
居於翰苑今臣以經史入侍司一行於中弟輒以丞  
轄立朝督綱條於外恭承明詔不許固辭以為兄弟  
之同升自是朝廷之盛事承明三入僅比古人大雅  
一門無慙舊史人非亦石恩重丘山恭惟 太皇太  
后陛下明極照臨憂深付託欲為社稷之衛莫如臣  
僕之賢以帝堯之哲而其畏於壬人以孔子之聖而  
思見於狷者致茲選擢驟及愚菴敢不淬礪初心激  
昂晚歲擔堅必死之節少報不貲之恩

謝三伏早休表二首

大火既中三庚云伏炎熹之病貴賤所同忽蒙退食  
之恩遂失流金之酷恭惟 皇帝陛下仁均動植明  
燭幽微上有無逸之勤下無不獨賢之歎臣等逢時多  
暇竊祿安居共揚扇暍之風以安黎庶更厲飲冰之  
節少荅生成

星火見而金微日方可畏朝氣銳而晝墮思獲少休  
上既知勞下皆忘暑恭惟 太皇太后陛下勞謙恭  
已忠恕及人雖天地無一物之私而父母有至誠之  
愛臣等仰蒙寬假動獲便安未明無顛倒之衣省循

何幸夙退有委蛇之食歌詠而歸

上皇帝賀冬表

易稱來復蓋知天地之心神但戒無為以待陰陽之定  
恭惟 皇帝陛下堯仁冠古舜孝通神種德兆民躬  
行文景之儉游心六藝灼知周孔之情人既和而歲  
自豐天不違而壽無極臣以緣衰病待罪江湖莫瞻  
北極之光但罄南山之祝

上皇帝賀正表

東方發律氣迎萬物之新高以面受圖禮勤三朝之始  
惟聖時憲自天降康共惟 皇帝陛下文武生知聖

神天縱舊邦新命既先啓以公前人大德小心以昭事  
於上帝臣久塵從橐外領並符敢傾葵藿之心仰獻  
松椿之壽

上太皇太后賀正表

堯曆授時夏正建統氣迎方泰之會祥應重明之朝  
恭惟 太皇太后陛下道無不能名德博而化天人所  
助本義易之益謙慈儉不屈得老氏之二寶時逢吉  
旦福集清宮臣職守江湖心馳象魏天威咫尺想聞  
清蹕之音眉壽萬年遠奉 冊觴之慶

儋州謝表

並鬼門而東，鷲浮瘴海以南，遷生無還期，死有餘責。中謝伏念，臣頃緣際會，偶竊寵榮，曾無毫髮之能，而有丘山之罪，宜三黜而未已。跨萬里以獨來，恩重命輕，咎深責淺，此蓋伏遇 皇帝陛下，堯文炳煥，湯德寬仁，赫日月之照臨，廓天地之覆育，辟之蠕動，稍賜矜憐，俾就窮途，以安餘齒。而臣孤老無託，瘡癩交攻，子孫慟哭於江邊，已為死別。魍魅逢迎於海上，寧許生還。念報德之何時，悼此心之永已，俯伏流涕，不知所云。

杭州賀冬表二首

月臨天統，首冠於三正。三氣應黃鍾，復來於七日。君道浸長，陽德光亨。恭惟 上皇帝陛下，清明在躬，仁孝徧物，垂衣南面，天何言而四時成。問孝西清，日將旦而群陰伏。蠻夷奔走，年穀順成。豈惟四海之歡心，自識三靈之陰贊。臣祇膺詔命，恪守郡符，身雖在於江湖，顏不忘於咫尺，敢同率土，惟祝後天。消長有時，候微陽之來。佑賢愚同慶，知君子之彙征。德化所加，神人並應。恭惟 太皇太后陛下，睿明天縱，慈儉身先，振海嶽以不傾地，無私載順陰陽之自化。天且不違，成功已陋於漢唐。論德蓋高於任姒，黃

雲可望共沾至治之祥彤史何知莫贊無為之德臣  
備員法從祗役海隅東門拜章阻陪於百辟南山獻  
壽待頌於萬年

同天節進功德疏表

伏以累聖儲休上天垂祐乃逢純乾之月肇興出震  
之祥恭惟 皇帝陛下以堯舜生知之資承祖宗積  
治之慶大有上吉天人之助已明既醉太平聖賢之  
福誠備至於臣子之私願是為草木之微情幸同海  
表之民共罄封人之祝

續添

賀坤成節表

臣軾言歲復六壬龍嘉祥於太史火流七月紀令節  
於詩人盡海宇之含生舉欣榮於茲日中賀臣聞君  
以民為心體天用民為聰明未有心胖而體不舒民  
悅而天不應故好生惡殺是為仁壽之基捐利與民  
斯獲豐年之慶恭惟 太皇太后陛下恭儉一德勤  
勞百為推天覆地載之心阜成民物盡父教母憐之  
道誨養臣鄰共知難報之恩必享無疆之福臣以出  
守淮海無由躬詣闕庭無邦

謝兼侍讀表二名曰

伏奉制書除臣守兵部尚書兼侍讀者重地隆名不  
擇所付清資厚祿以養一不才中謝伏念臣以草木之  
微當天地之澤七典名郡再入翰林兩除尚書三忝  
侍讀雖當世之豪傑猶去不易居矧如臣之孤危其何  
能副恭惟 皇帝陛下聖神格物文武憲邦重離繼  
明何煩燭火之助大厦以構尚求一木之支而臣白  
首復來丹心已折望西土河之帷幄以立傍徨聞長樂  
之鼓鍾恍如夢寐莫報丘山之施猶實頃刻之榮臣  
無任

流汗恩榮再任莫獲強顏衰朽一節以趨中謝恭惟

先帝復六卿之名本欲後人識三代之舊古今殊制  
閑劇異宜武選隸於天官兵政總於樞輔故司馬之  
職獨省文書而師氏之官職在論說命臣兼領聖意  
可知恭惟 太皇太后陛下約已裕民忘家憂國知  
先王之兵必本於道德故以儒臣為七兵知人主之  
學必通於民情故自郡守為五學而臣迂踈不可強  
合早緣衰病難以久居終當自效於所長之間或可  
報恩於未死之日臣無任

進郊祀慶成詩表

伏覩今月十四日郊祀禮成者親奠璧琮始見天地

兼陳祖宗六朝之典參用漢唐三代之文夷夏來同人神允答中賀恭惟 皇帝陛下聿追來孝對越在天外修神考之文章內服文母之慈儉四方觀禮百辟宅心雪止風恬驗神祇之來饗雲若八歲美知豐凶之在人臣以藝文入侍帷幄考事而知天意陳詩以達民言雖無足觀亦各其志臣無任瞻天望聖慚懼屏營之至所撰郊祀慶成詩一首謹繕寫陳表上進以聞

謝除兩職守禮部尚書表

伏蒙聖恩除臣端明殿學士兼翰林侍讀學士守禮

部尚書者衰年自引久抱此心異數併加實為非意辭不獲命愧何以堪中謝竊惟以廢命官本緣麟趾之舊因時修廢近正金華之名歷代所祭於今為甚自元豐之末官制以來若非身兼數器之人未有名冠兩職之重而况秩宗之任邦禮是司豈臣迂愚所當兼領此蓋伏遇 太皇太后陛下憂深社稷慮極安危求忠臣於愚直之中論治道於文子之外知臣難進而易退或非患失之鄙夫故授以禮樂清閑之司使專於論說琢磨之事此恩難報願輸歲月之勤度已所宜終遂江湖之請臣無任

辭免侍讀狀

右臣今月二十六日準閣門告報蒙因除臣兼侍讀者入侍邇英其選至重非獨分摘章句貫以仰備顧問臣學術淺陋恐非其人况臣待罪禁林初無吏責又加廩賜之厚益負尸素之憂伏望聖慈察其誠心追回新命以授能者謹錄奏聞伏候勅旨

辭免翰林學士并百第一狀

右臣今月二十八日奉勅已除臣翰林學士承旨左朝奉郎知制誥詔書到日可依條交割公事訖乘西馬疾速發米赴闕臣已於當日依條交割公事訖伏

念臣頃以兩目昏暗左臂不仁堅辭禁林得請便郡庶緣靜退少養衰殘二年于茲一事無補才有限而難強病不減而益增但以東南連被災傷不敢陳乞別求安便敢謂仁聖尚賜恩憐召還故官復加新寵不惟朝廷公議未允實亦衰病勉強不前兼竊觀邸報臣弟輒已除尚書右丞兄居禁林弟為執政在公朝既合迴避於私門實懼滿盈計此誤恩必難安處伏望聖慈除臣一郡以息多言臣具起發前去至宿泗間聽候指揮謹錄奏聞伏候勅旨

第二狀

右臣近蒙恩除翰林學士承旨臣以衰病不才難居  
禁近兼以弟轍忝與執政理合迴避奏乞除臣一郡  
今奉詔書未賜開允恩威之重需之石雷雨豈臣孱陋  
所敢固違伏念臣自去闕庭日加衰白故疾不愈舊  
學已荒更冒寵榮必速顛躓而况清要之地衆所奔  
趨兄弟迭居勢難安處正使綴劬力辭而獲譴猶賢於  
忝冒而致災伏望聖慈察臣誠懇特賜除臣知揚越  
陳蔡一郡臣今已到揚州之漕廨前去南京以來聽候  
指揮干冒天威臣無任

第三狀

右臣近蒙恩除翰林學士承旨臣以衰病不才難居  
禁近兼以弟轍備位執政理合迴避尋兩次奏乞除  
臣一郡準尚書省劄子三省同奉 聖旨依前降詔  
書不允者臣之愚慮終以弟轍親嫌於義未安竊見  
仁宗朝王洙為學士以其從子堯臣參知政事故罷  
臣今來欲乞依王洙故事迴避仍乞檢會前奏除臣  
揚越陳蔡一郡屢犯天威臣無任

乞候坤成節上壽訖復遂前請狀

右臣近奏乞依王洙故事罷翰林學士承旨仍乞一  
郡奉 聖旨依前降指揮不允者銜戴恩慈怵迫威

命已經三却其取固違已於今月二十九日赴閤門  
祇受告命訖然口口衰病日加心力難強親嫌之避愚  
守不移伏見坤成以節在近欲候上壽訖復遂前請勉  
強供職庶表見口口于恭順之心遂巡力辭蓋終存典  
刑分義之守謹錄一奏聞伏候勅旨

笏記二首

臣蒙恩授翰林學士承旨知制誥兼侍讀者出膺闕  
寄入長禁林皆煙者之極榮豈駕材之所稱此蓋伏  
遇 皇帝陛下法天凝命稽古象賢總攬群英兼拔  
小器欲効涓塵之報未知縻隄之期臣無任

臣蒙恩授翰林學士承旨知制誥兼侍讀者出守無  
功方期竄逐乃還何幸復玷清華此蓋伏遇 太皇  
太后陛下坤載沉潛毋慈均一既陶甄於頑鑛復封  
植於散材擢卒餘生少圖來效臣無任

謝除兵部尚書賜對衣金帶馬狀二首

蒙恩賜臣衣一對金帶一條并魚袋金鍍銀鞍轡馬  
一匹者盛服在躬無復曳婁之歎名駒出廐遂忘奔  
走之勞施重丘山身輕毫末伏念臣少賤而鄙性惟  
少文衣敝緼袍未嘗有恥乘款段馬自以為安豈意  
晚年屢膺此寵此蓋伏遇 皇帝陛下紹隆景命總

攬群英無競維人勢已加於九鼎惟德其物恩有重  
於千金臣敢不上體眷懷勉思報稱贈繞朝之策愧  
不能謀振屈原之衣期於自潔臣無任

伏以在笥之珍本出於民力脫駢之賜以結於士心  
顧臣何人屢膺此寵伏念臣學本為己材不遁時乘  
伯厚之車雖云疾惡東公西之帶愧不能言而二年  
之間三拜是賜此蓋伏遇 太皇太后陛下心存社  
稷德協天人以長策駕馭四方以盛德藩飾多士故  
令衰朽猶玷光華豈曰無衣蓋獨求於安吉慨然攬  
轡敢有志於澄清臣無任

謝賜對衣金帶馬狀二首

蒙恩賜衣一對金帶一條并魚袋金鍍銀鞍轡馬一  
匹服官奠篚響動佩章園士效牽光生鸞策伏以三  
賜之重莫隆於車馬五采之貴兼施於衣裳汝必有  
功服之無斁而臣衰年弱幹固難強於馳驅枯木朽  
株本不願於文繡寵加意外愧溢顏間此蓋伏遇  
皇帝陛下因能任官稱物平施操名器以勵士上有  
誠心正銜勒以馭人下無遺力臣敢不思稱其服益  
勵厥躬雖愧立朝之能言之近用猶希辨道輸老智  
於莫年臣無任

蒙恩賜衣一對金帶一條并魚袋金鍍銀鞍轡馬一匹服章在笥賁及衰殘街勒過庭喜先徒御伏以物生有待天施無窮草木何知冒慶雲之渥采魚鰕至陋借滄海之榮光雖若可觀終非其有妻孥相顧驚屢致於匪頌道路竊窺或反增於指目此蓋伏遇太皇太后陛下聰明齊聖陳錫載周含垢匿瑕而察於求賢卑宮菲食而侈於養士士豈輕於千里念非其人言有重於兼金當思所報臣無任

笏記二首

榮兼兩職寵與六卿豈伊衰朽之餘有此遭逢之異

此蓋伏遇 太皇太后陛下坤元利正天造無私靡求備於一人將曲成於萬物文章小技縱有效於涓埃草木微生終難酬於雨露臣無任

陞榮祕殿列職西清併此光華付之衰朽與蓋伏遇 皇帝陛下剛健純粹緝熙光明曲搜已棄之材將建無窮之業顧慙淺陋將何補於盛明惟有朴忠誓不回於生死臣無任

Large, faint watermark characters, possibly reading '上海' (Shanghai).

Vertical columns of text within a rectangular border, likely bleed-through from the reverse side of the page.

Small vertical text on the right edge, possibly a page number or title fragment.

